



ARTIGU PESKIJA ORIJINAL

HODI BELE ASESU

PAPEL ASOSIASAUN CHEGA! BA ITA (ACbit) NIAN HODI APOIU EKONOMIA BA FETO VÍTIMA VIOLASAUN SEKSUAL KONFLITU 1974-1999

Author: Silveru Siri Andrade da Silva

(Estudante Faculdade Ciências Sociais e Humanas, Universidade da Paz)

Co-Author: Rev. Samuel Carlos Ribeiro

Faculdade Ciências Sociais e Humanas, Universidade da Paz)

ABSTRATU

Iha peskiza ne'e sei halo abordajen multidisiplinar, Siénsia Polítika, Relasaun Internasionál, Estratejia, Istória, Direitu Internasionál, Konvensaun no seluk-tan. Sei ezamina importansia Papel Asosiasaun Chega ba Ita nian hodi apoi ekonomia ba feto vítima violasaun seksual konflitu 1974-1999. Dezafiu boot ida mak oinsa atu garantia ekonomia ida ne'ebé mak sustentavel ba povu tomak iha Timor-Leste inklui inan feton sira ne'ebé mak sai vítima ba violasaun seksual husi konflitu 1974-1999.

Teoria ne'ebe mak uza hodi haforsa liu tan peskiza ida ne'e hakerek nain uza teoria hanesan: teoria papel, teoria ekonomia, teoria ekonomia mikro, teoria vítima, teoria konflitu no teoria funu.

Metodu peskiza ne'ebe mak uza metodu kualitativu deskriptivu no halo analiza hakerek nain uza teoria Milles Huberman iha livru Sugiyono 2018, ho tekniku rekolla dadu sira no tekniku analiza sira.

Rezultadu husi peskiza ida ne'e hakerek nain deskobre katak papel ACbit nian hodi fó apoiu ekonomia negosiu kiik ba feto vítima sira ne'e ajuda tebes sira hodi hasae rendimentu iha sira nia familia, no rendimentu ne'ebehan husi negosiu mak uza ba nesiedade baziku, selu oan sira ba ekola, no halo uma. Dezafiu ne'ebe ACbit hasoru mak sei menus ba fundus hodi fó apoiu ba feto vítima sira hotu iha Munisípiu sanulu resin rua (12) no RAEOA.

Konkluziun husi rezultadu peskiza ne'e hatudu katak papel ACbit lao ho diak no sei menus ba apoiu finanseiru.

Liafuan Xave: Polítika Papel, ACbit, Apoiu Ekonomia

1. Antesedentes

República Demokratika Timor-Leste (RDTL) nu'udar nasaun foun ida iha mundu, ne'ebé restaura ninia independensia iha loron 20 fulan Maiu 2002, depoiz de hetan ukun husi colonial portugés durante sékulu 4 resin, no husi okupasaun illegal Indonézia durante tinan 24. Dezafiu boot ida mak oinsa atu garantia ekonomia ida ne'ebé mak sustentavel ba povu tomak iha Timor-Leste, inklui inan feton sira ne'ebé mak sai vítima ba violasaun seksual husi konflitu 1974-1999.

Ho dezafiu ne'ebé mak mensiona iha leten loke entidades sira hotu nia hanoin hodi bele dezenvolve no investe iha seitor produktivu sira hanesan agrikultura atu nune'e bele hadia sistema ekonomia ida ne'ebé efektivu ba populasau sira iha Timor laran tomak liu-liu ba sira ne'ebé hela iha area rural inklui feto vítima violasaun seksual husi konflitu pasadu. Tanba tuir sensus 2010 Timor-Leste nia populasau milau 1.066 maizumenus 70% mak hela iha area rural, no sira nia moris depende ba iha vida agrikultura hodi sobrevive sira nia moris. (Fontes: ADB, 2015, Relatoriu Asia Development Bank (ADB), avaliasau setór privadu nian iha Timor-Leste, Publika hosi: Asia Development Bank.) Tanba ne'e ita nia governu liu husi ministeriu relevante sira

tenke implementa ho diak ba programa sira ne'ebé planeia ona iha Planu Estratejiku 2011-2030 liu-liu iha kapitulu 4 ne'ebé mak koalia kona-ba dezenvolvimentu ekonomia no fahe ba parte 5 hanesan Dezenvolvimentu Rural, Agrikultura, Petroleum, Turizmu no Investimentu Seitor Privadu. Além de ne'e Timor-Leste mós hanesan membru husi Nações Unidas ne'ebé mak adopta ona objetivu global "*Sustainable Development Goal (SDG)*" ou Objetivu Dezenvolvimentu Sustentavel iha 2015-2030, inklui objetivu 17 liu-liu objetivu 1-2 ne'ebé mak koalia kona-ba laiha kiak no laiha hamhala hodi nune'e bele garantia ekonomia ida ne'ebé mak sustentavel ba povu tomak inklui feto vítima violasaun seksual sira husi konflitu pasadu. Tuir "relatoriu final Comissão Açoilhimento Verdade e Reconciliação (CAVR 2005)" katak feto vitima violasaun seksual husi konflitu pasadu hamutuk 853 mak hato'o sira nia deklarasaun ba komisaun kona-ba esperensia estragus seksual no sai atan ba seksual durante konflitu. Além`de ne'e durante CAVR nia mandatu feto vítima barak mós la hato'o sira nia deklarasaun, tanba ne'e komisaun estimativa katak numeru feto vítima sira ne'ebé hetan violasaun seksual laos atus ba atus maibe rihun ba rihun. Husi relatoriu ida ne'e hatudu katak feto vítima barak mak

hetan violasaun seksual no torturasaun oi-oin husi konfliktu pasadu, ho sira nia esperensia moruk ida ne'e fó impaktu boot ba sira nia vida moris iha era independensia, tanba vítima barak mak sei moris iha situasaun truma nia laran, sei hetan diskriminasaun husi sira nia familia no komunidadadi katak sira bapak (militar Indonézia) nia fen, bapak nia nona, nafatin hetan violénsia foun, laiha direitu atu sai nain ba rai no mós trauma ne'ebé la rezolvidu husi violasaun no lakon ne'ebé sira esprensia afeita ba sira nia saúde no abilidadade hodi halo servisu Oan husi vítima sira mós barak sei hetan estigmasaun husi sira nia familia no komunidadade katak sira ne'e bapak nia oan, tanba ne'e wainhira sira hola tiha mane sempre mósu violénsia oi-oin no mós hetan abandona husi nia laen tanba dehan sira laiha aman no karik laen sira abandona se mak atu koalia hasoru sira. Sira barak mós labele halo tratamentu ba sira nia dokumentus sira hanesan, sertidaun baptizmu no sertidaun RDTL tanba autoridade relevante sira sempre ejize aman nia naran lolos husi labarik sira ne'e, maibe maioria husi labarik sira ne'e aman mak Militar Indonézia sira, tanba ne'e difisil tebes ba sira atu asesu. Ho situasaun no kondisaun sira ne'e hotu halo feto vítima sira sai vulneravel liu tan liu-liu

vulnerabilidade iha ekonomia, moris kiák, uma at, laiha bee, sanitasaun ka eletrisidade, no seidauk asesu ba governu nia programa assisténsia sosiál ruma ka apoiu ekonomiku husi grupu seluk.

Ho problema sosiál hotu ne'ebé vítima violasaun seksual husi konfliktu pasadu hasoru iha era independensia mak hafanun ativista sira hodi estabelese no funda Asosiasaun Chega! ba Ita (ACbit) atu bele halo advokasia ba vítima sira nia direitu no mós tau matan ba sira. ACbit estabelese iha lora 26 fulan Setembru 2010 no rejistu iha Ministeriu Justisa iha lora 7 Feveireiru 2013, hanesan organizasaun naun governmental ida ne'ebé mak estabelese hodi kontinua hala'orekomendasaun balu ne'ebé mak mensional ona iha relatoriu Comissão Acholimento Verdade e Reconciliação (CAVR 2005) liu-liu kona-ba programa reparasaun ba vítima sira, maibe atu implementa programa ida ne'e laos papel ACbit nian, autor prinisipal atu hala'opapel ida ne'e mak governu. ACbit hanesan inisiador ka parseiru husi governu hodi hala'oprograma ida ne'e liu husi apoiu fundus ne'ebé mak hetan husi parseiru governu liu-liu ministeriu relevante sira hanesan Ministeriu Solidariedade Social no Inclusão (MSSI), Sekretaria Estado Igualdade no Inclusão (SEII) no mós

parseiru internasional sira ne'ebé mak servisu hare ba asuntu fetu hanesan UN Women, Asia Justice and Right (AJAR) no Hivos Tanba ne'e ACbit servisu foka liu ba fetu vítima violasaun seksual husi konfliktu 1974-1999. Husi 2010, ACbit hala'okampaña ba rekomendasau sira husi Chega! kria diálogu públiku hodi fó sai violasaun ba fetu sira nia direitu iha tempu pasadu no lobi governu relavante sira no organizasaun naun-governmental sira hodi implementa politika no assistensia esensial sira hodi apoiu vítima husi violénsia.

ACbit nia vizaun mak aprende husi pasadu hodi prevene violénsia iha futuru, buka lia loos no direitu ba fetu vítima sira husi konfliktu pasadu, no halo reparasaun ba vítima sira nia moris Misaun mak hasae koñesimentu jerasaun foun sira nian kona-ba istória pasadu liu husi Atividade School visit no chega! Mobile, hakerek vítima sira nia istória liu husi intrevista no metodolojia Peskiza Asaun Partisipativu (PAP), memorializasaun, lao vizita fatin istóriu sira hodi konta istória pasadu husi sasin vítima sira no hadia vítima sira nia moris liu husi apoiu fundus kiik no estabese sentru grupu ba sira hodi hala'osira nia atividade. (Fontes: ACbit, 2019, Relatoriu Peskiza Asaun Partisipatoriu (PAP), "Hadia Kondisaun Moris ba Fetu Sobrevivente Sira

Iha Timor-Leste" Publika husi ACbit) Hahu husi 2013 to 2019 ACbit apoiu ekonomia ba fetu vítima hamutuk 278 husi munisípiu 12 inklui RAEOA, tipu apoiu ne'ebé mak ACbit fornese mak hanesan: material uma hamutuk 28, tratamentu saúde 100, apoiu fundus hodi hala'onegosiu kiik (fan kios, fan dosi, kuda modo, soru tais, suku roupa no seluk-seluk tan) hamutuk 144, no apoiu seluk 24, parte seluk ACbit mós estabese sentru grupu 6 iha munisípiu 5 ba vítima sira hodi hala'osira nia atividade ekonomia. (Fontes: ACbit, 2019, Data Base, Asosiasaun Chega! Ba Ita)

Maibe dezafiu ne'ebé ACbit hasoru mak ho assistensia ne'ebé ACbit fornese sei la kompleta vítima hotu nia nesesidade no mós ladun garantia maximu ba apoiu kontinuasaun tanba ACbit hanesan organizasaun naun governmental ida ne'ebé mak dependensia ba apoiu fundus husi doadores nasional no internasionál sira. Tanba ne'e vizaun boot ne'ebé ACbit hamutuk ho vítima sira lutu makas atu atinji mak oinsa nia governu bele halo papel ida ne'e hodi implementa programa reparasaun ba vítima sira.

2. Identifikasaun Problema

Bazea ba introdusaun iha leten hakerek nain identifika ona problema sira iha kraik:

1. Feto vítima sira hetan rendimentu ne'ebé mak kiik, hodi sustenta sira nia moris iha familia no mós selu oan sira ba eskola.
2. Sedauk iha apoiu espesifiku ruma husi governu ba feto vítima violensia seksual sira.

3. Formulasauin Problema

Bazeia ba identifikaun problema iha leten maka hakerek nain formula problema iha proposta ida ne'e hanesan tuir mai ne'e:

“Oinsa mak papel Asosiasaun Chega! Ba ita (ACbit) nian hodi apoiu ekonomia (negosiu kiik) ba feto vítima violasaun seksual husi konflitu 1974-1999, atu nune'e bele hasae sira nia rendimentu iha familia”?

4. Objektivu Peskiza

Objetivu husi peskiza ida ne'e mak atu koñese, analiza no halo diskripsaun kona-ba Papel Organizaun Naun-Governmental Asosiasaun Chega! ba Ita (ACbit), hodi halo esforsu ba direitu feto vítima violasaun seksaul husi konflitu 1974-1999 kona-ba assistensia ekonomia.

5. Enkuadramentu Teoria

David Berry (2003:105), fó definisaun katak papel hanesan esperansa

ida utiliza kada individu ne'ebé mak okupa iha pozisaun sosiál nivel altu sira. Esperansa sira ne'e mak balansu husi norma sosiál no tanba ida ne'e mak intrepréta katak papel ne'e determina husi norma sira ne'ebé iha komunidadade nia let. Papel ne'e rasik iha esperansa oin rua mak hanesan; esperansa ida mak iha husi individu ne'ebé halo papel hasoru komunidadade ou hasoru ema ne'ebé mak hala'opapel ka dever. Bazeia ba opiniaun iha leten hakarak halo konkluzauin katak papel mak atetudi hatudu husi ema ruma tanba dever husi sira nia pozisaun ou servisu.

Soerjono Soekanto hatete katak: Papel mak aspetu dinamika kona-ba pozisaun (*status*). Karik ema ruma hala'osira nia direitu no dever tenki hanesan ho sira nia pozisaun para bele hala'osira nia papel. Tuir nia papel fahe ba parte tolu:

1. Papel inklui norma sira iha koneksaun ho pozisaun ka okupasaun ba ema ruma iha komunidadade nia let.
2. Papel mak konseptu ida kona-ba saida mak individu ida halo iha komunidadade nia let.
3. Papel ne'e bele dehan hanesan atetudi individual ne'ebé mak importante ba estrutura sosiál iha komunidadade.

Poerwadarminta (1995:751) katak “asaun ne’ebé mak hala’ohusi individu ka grupu iha eventu ruma. Bazeia ba opiniaun ida ne’e papel mak atitude ne’ebé ema sira okupa pozisaun iha comunidade no ho esperansa atu eziste ba sira. Pozisaun ho papel mak benefisiu husi koñesimentu, parte rua ne’e labele halo separasaun.

Parte seluk definisaun husi papel ne’ebé mak apresenta husi (**Soerjono Soekanto, 2002: 243**) katak *expectação* ida ne’ebé mak obriga individu ka grupu atu hala’osira nia direitu no dever tenki hala’ohusi *stakeholder* sira mak iha konkordansia ona ho comunidade kona-ba saida mak sira espera.

ACbit nia papel mak hakerek vítima sira nia istória husi pasadu liu husi intrevista no metodolojia Peskiza Asaun Partisipatoriu (PAP), promove fatin istóriu sira liu husi atividade memorializasaun, lao vizita fatin istóriu sira hodi konta istória pasadu husi sasin vítima sira, fasilita sorumutu *trauma healing* ka kura laran kanek ba vítima violasaun seksual husi konflitu pasadu, hasae foin sae sira nia koñesimentu kona-ba istória pasadu liu husi atividade vizita eskola no chega! Movel, halo advokasia ba direitu vítima sira nian atu nune’e sira bele asesu ba assistensia sosiál no saúde, no mós hadia vítima sira nia moris liu husi apoiu

ekonomia (fundus kiik), estabelese sentru grupu ba sira hodi hala’o sira nia atividade. Definisaun Ekonomia tuir *KBBI (Kamus Besar Bahasa Indonesia)* katak siensia kona-ba prinsipiu produsaun, distribuisaun ho uza produktu no riqueiza hanesan finanseiru, industria no komersiu.

Iha *KBBI* mós fó definisaun ba ekonomia hanesan vantajen finanseiru, forsa, tempu no seluk tan, buat ne’ebemak iha valor no mós hanesan vida ekonomia iha nasaun ida ka asuntu finanseiru domestiku Tuir *Kamus Lengkap Bahasa Indonesia*, negosiu katak atividade ne’ebeindika ba enerjia, hanoin ou isin lolon hodi atinji buat ruma signifika servisu (asaun, iniciativa, servisu makas no esforsu), servisu makas hodi atinji buat ruma.

Tuir **Hughes no Kapoor** negosiu ou bisnis katak “*Bussiness is the organized effort of individuals to produce and self for a profit, the goods an services that satisfy society’s needs. The general term business refers to all such efforts within a society or within an industry.*”

Signifika negosiu ou bisnis mak atividade individu ne’ebemak organizadu hodi produz no fan bens e serviço ne’ebefó satisfasaun ba populasau sira nia nesesidade. Jeralmente termu negosiu refere

ba esforsu hotu-hotu iha sosiedade ou iha industria ruma.

Tuir **Sadono Sukino** definisaun ekonomia mikro katak sanak husi siensia ekonomia ne'ebemak aprende komportamentu konsumidor no empreza hodi determina presu merkadu no kuantidade kona-ba fator rendimentu, ba bens no servicos ne'ebemak fan no sosa. Ekonomia mikor ida ne'e analiza oinsa mak desizaun oi-oin no komportamentu refere influencia *penawaran dan permintaan* kona-ba bens no servicos ne'ebesei determina presu, no kontinua determina *penawaran dan permintaan* bens no servicos.

Individu-individu sira iha leten injeralmente halo klasifikasaun liu ba: 1. Familia (*Household*)

2. Empreza (*Business*)

Objetivu husi ekonomia mikro mak:

- a. Halo analiza ba mekanismu merkadu ne'ebemak sei forma presu relativu kona-ba produitu bens no servicos.
- b. Analiza failansu merkadu iha momentu produz rezultadu ne'ebemak efisiensia. Além de ne'e halo esplikasaun ba kondisaun teoritiku ne'ebepresiza iha merkadu ho kompetisaun perfektu.

Tuir *kamus Crime Dictionary* cita husi matenek nain (**Abdussalam, 2010:5**) katak vítima mak “ema ne'ebé mak hetan

sofrimentu fiziku, mental, lakon eransa, objetu ka rezulta mate husi asaun ou tentativa ou violasaun minor ne'ebé mak komete husi autor kriminozu no seluk-seluk tan”.

Além de ne'e tuir **Arif Gosita**, hateten signifikaun husi vítima mak “sira ne'ebé sofre fizika no espiritualmente hanesan rezultadu husi asaun husi ema seluk ne'ebemak fó satisfasaun ba sira nia an ka ema seluk ne'ebemak la konkorda ho direitu no interese umanu”

Tuir **Z.P.Separovic** Vítima (*victim*) mak “ema ne'ebé mak hetan ameasa, hetan kanek, estragus husi autor ou abandona husi ema seluk (signifika, estrutura, organizasaun, ou instituisaun) no tanba ne'e; vítima mak ema ne'ebé hetan sofrimentu ou ameasa husi sansaun (laos asaun kriminal deit maibe mós sansaun seluk hanesan violasaun minor, vilasaun ekonomia, la kompleta knar servisu) ou asidente. Sofrimentu ne'e bele kauza husi mane seluk ou estrutura seluk ne'ebé mak ema involve”. Atu halo konkluzau deit tuir matenek nain sira nia hanoin ne'ebemensiona iha leten, vítima mak ema terus, sofre ou mate tanba afeita husi akontesimentu ruma, no komete husi ema seluk ka grupu seluk ne'ebemak iha interese. Hare husi papel vítima iha akontesimentu kona-ba asaun kriminal,

Stephen Schafer hateten prinsipalmente iha tipu vítima 4:

1. Ema ne'ebemak laiha erro ka sala, maibe nafatin sai vítima. Ba tipu ida ne'e, sala husi autor.
2. Vítima consciente ou inconscientemente, halo asaun ne'ebemak estimula ema seluk atu halo asaun krimi. Ba tipu ida ne'e, vítima afirma partilha ba malu iha akontesimentu krime atu nune'e erro ka kulpa ruma bele lokaliza ba autor ho vítima.
3. Sira ne'ebemak biolojikamente no sosialmente sai potencia ba vítima. Labarik, ema boot, ema difisiente fiziku no mental, ema kiak, grupu minoridade no seluk tan mak sai hanesan ema ne'ebemak ba vítima. Vítima iha kontekstu ida ne'e labele fó sala ba malu maibe comunidade mak tenki toma responsabilidade.
4. Vítima tanba nia rasik mak autor. Ida ne'e bele intrepeta hanesan krime sem vítima. Prostituisaun, jogus, adultério mak krime ne'ebemak parte iha krime sem vítima, parte ne'ebemak vítima tanba nia mós hanesan autor.

Definisaun violénsia seksual tuir *Kamus besar Bahasa Indonesia*, liafuan violénsia signifika hanesan:

- a) Sujeitu ne'ebemak ho karakteristik espertu,
- b) Asaun husi individu ou grupu afeita estragus fiziku ou material,
- c) Obrigasaun (**KBBI, 2005: 550**).

Além de ne'e iha nia definisaun violénsia hanesan modelu asaun ne'ebemak ho karakteristik fiziku, rezulta kanek, aleiza, moras ou terus ne'ebesofre husi ema seluk, liu-liu elementu ida ne'ebemak presiza fó atensaun signifika obrigatoriu ou lagosta ka laiha konkordansia husi parte ne'ebemak sofre (**Wahid, dkk, 2001: 54**).

Tuir **Yulaelawati (2015: 111)** violénsia seksual mak modelu koneksaun ida ne'ebemak negativu no asaun sosiál. Iha violénsia seksual ne'ebemak akontese, signifika akontese hela kazu seriu ruma iha comunidade nia let. Pensamentu seluk ne'ebemak apresenta husi **Suyanto (2010)** katak violénsia seksual signifika asaun ida ne'ebemak akontese ho forma obrigatoriu ou ameasa atu halo relasaun seksual (*sexual intercourse*), halo torturasan ou asaun brutal hodi abandona ema ruma, inklui sira ne'ebemak sei idade minoria, depois de halo relasaun seksual.

Konflitu katak prosesu alkansa objetivu ho meius hafraku parte ne'ebekontra sem fó atensaun ba normas no atetudi. Konflitu mós signifika prosesu involve iha negosiu ruma husi grupu balu hodi estraga (*destroy*) grupu seluk hanesan konflitu klase (**Soekanto, 1993**).

Konflitu mak hanesan modelu interaksaun sosiál. Modelu interaksaun sosiál bele hanesan koperasaun (*cooperation*), kompetisaun (*competition*) no *contenção* (*conflict*) (**Soemarjan no Soemardi, 1974: 177**). Além de ne'e konflitu mós bele intrepeta hanesan problema sosiál mak mósu tanba iha diferansa pensamentu ne'ebekontese iha comunidade nia leet tanto iha nasaun Konflitu mak aspetu natural no laiha possibilidade atu hases an husi mudansa sosiál. Ida ne'e hanesan espresaun heterogonidade ba interese kona-ba valor, benefisiu no esperansa ne'ebemósu hanesan forma foun ida kria husi mudansa sosiál ne'ebemak mósu kontrariu ho limitasaun ne'ebemak infrenta. Maske meius akompaña konflitu mak problemas, hábitua no eskolla. Katak talvez muda no responde hábitua no halo determinasaun ba eskolla ne'ebefixu. (**Miall, et,al, 2000; 8**).

Durante tinan 25 hosi 1974 ba 1999, Timor-Leste moris hasoru konflitu violentu iha rai laran. Bainhira administrasaun

koloniál Portugál nia remata iha tinan 1975, iha tinan ne'e mós nasaun viziñu Indonézia invade no okupa fali kedas Timor iha loron 7 fulan Dezembru 1975, ne'eberezulta iha violasaun ba direitus umanus no krime grave oin-oin hasoru umanidade durante períodu tinan 24 laran. Iha 1999 hafoin ONU hala'o tiha konsulta populár, konflitu violentu bo'ot ida mosu tan hodi hamate ema rihun resin ho barak mak sai refujiadu iha rai laran no rai liu'ur. Iha estimativa katak Timor-oan sira entre na'in 102.800 no 183.000 hosi ema hamutuk besik millaun 1 iha tempu ne'ebá mak mate nu'udar rezultadu hosi okupasaun Indonézia, no iha tinan 1999, sorin tomak hosi populasauniha tempu ne'ebá sai dezlokadu nu'udar rezultadu hosi konflitu. (Fontes: CEPAD, 2015, Reziliensia husi Perspetiva Lokal; FAR Timor-Leste Relatoriu Nasional, Publika hosi: CEPAD no Interpeace.)

Simplesmente **Carl Von Clausewitz** fó definisaun balu kona-ba natureza funu Definisaun husi funu mak involve parte rua ou liu ne'ebehasoru malu no parte ida-idak utiliza forsa fiziku, koko obriga parte seluk hodi halo tuir sira nia vontade. Iha enfaze ida ne'e utilizador forsa fiziku sira (signifika kilat). Iha eskla ne'ebe boot signifika parte sira ne'ebemak kontra injeralmente entre nasaun no laos grupu ida hasoru ema husi

grupu seluk iha nasaun ida. Karik la utiliza forsa fiziku mak kondisaun refere seidak bele dehan funu. Objetivu mak parte seluk atu estragus nia adversariu atu nune'e laiha forsa hodi kontra.

Forsa signifika fiziku, no rekoñese hanesan meius ida iha funu. Enquanto atu obriga inimigu tuir ita nia vontade mak objetivu. Atu garantia ita nia objetivu mak, ita tenki halo inimigu laiha forsa. Ho termu seluk, funu katak asaun violentu hodi obriga inimigu submete ba ita nia hakarak. **Clausewitz** hateten katak *"You can not do this unless you destroy the enemy's power to resist; for if you don't render him powerless, he will try to render you powerless in his turn."* It la bele halo ida ne'e sekarak ita estragus inimigu sira nia forsa hodi hasoru ka kontra, karik ita la halo sira laiha forsa maka sira sei koko atu halo ita laiha forsa iha sira nia parte. Bainhira inimigu sei iha kapasidade hodi sobrevive, ita tenki kontinua esforsu hodi estragus sira. Laiha liafuan para ne'ebe mak ita halo. Ida ne'e meius principal ne'ebe mak ita halo karik atu atinji objetivu ne'ebe ita hakarak.

6. Metodu Peskiza

Metodu peskiza hanesan maneira ne'ebé halao husi ema sirane'ebé halo pesikza ho objetivu atu identifika akontesimentu ida ka

fenomena ida idane'ebé akontese iha kampu de baze ka fatin ne'ebé determina ona, no metodu peskiza ne'e nia laran bele uza metodu peskiza kualitativu no mos bele uza metodu peskiza kuantitativu, depende ba dadu sira ne'ebe mak foti ka halo peskiza hosi peskizadór ida. **Hanoin husi Sugiyono (2018:2) Fatin Peskiza** mak iha Edifisiu ACbit Justice and Right (AJAR) Farol Dili Timor-Leste.. **Informante** mak Diretora ACbit, Xefi Ekipa ne'ebe buka tuir feto vitima nain rua. **Fonte ba dadu husi Dadu Primaria no Dadu sekundaria** husi fatin peskiza. **Tékniku Halibur dadu husi :** Observasaun, Intervista no Dokumentasaun iha fatin peskiza. **Teknika Analiza Dadu** ho Dadu hotu-hotu mak halibur hamutuk hodi análiza ho metodu kualitativu deskriptivu ho objetivu atu hatene signifikadu klean kona-ba Papael Organizasaun **ASOSIASAUN CHEGA! BA ITA (ACbit)** hodi buka tuir feto vitima sira.

7. Resultadu Peskiza no Diskusaun

Aprezentasaun dadu sira tuir rezultadu peskiza mak hanesan tuir mai ne'e:

7.1 Programa saida mak ACbit iha hodi fó apoiu ba feto vítima sira husi konflitu pasadu hodi hasae sira nia rendimentu?

“ami nia programa kona-ba hasae rendimentu ba fetu vítima sira iha parte rua:Primeiru mak fó kapasitasaun liu husi treinamentu hodi hakbit sira nia skill ka badaen, hanesan ne’ebemak seidak hatene halo negosiu no mós seidak halo jestaun ba negosiu ho diak, entaun ami halo kolaborasaun servisu ho institusaun relevante sira hanesan Instituisaun do Apoiu de Empresarial (IADE) hodi fó treinu ba sira oinsa mak hahu sira nia negosiu, no oinsa mak halo jestaun ba sira nia negosiu ho diak, oinsa mak atu rai osan, hatene osan tama no osan sai no oinsa mak atu kompriende hodi desenvolve sira nia rendimentu ho diak. Segundu ami hare liu ba oinsa fetu vítima sira bele iha atividade, tanba fetu vítima sira barak mak laiha osan, entaun ami fó modal ou fundus kiik ruma ba sira atu motiva sira hodi halo sira nia atividade negosiu loke kios, fan dosi, modo, soru tais, no hakiak animal. Iha parte seluk ami mós fornese material sira deit hanesan makina dulas kafe, makina suku roupa, kabas hodi soru tais, no mós sasan kios.

Fundus ne’ebemi fó bazeia ba identifikasaun kona-ba atividade saida mak bele halo, no mós sira senti bele fó rendimentu ba sira, ne’e mak hanesan soru tais, suku kurse, suku farda eskola, hakiak animal no loke kios. Parte seluk fan mós sira nia produktu local sira iha merkadu, agora dadaun ACbit mós koko ajuda vítima sira liu husi servisu hamutuk ho parseiru henesan loja agrikultura, lori vítima sira nia produktu local ba fan iha ne’eba, no Ministeriu Turismo Comercio no Industria, Fundasaun Alola liu-liu wainhira parseiru sira ne’e loke feira ka espozisaun ruma, fetu vitima sira mós bele partisipa hodi fan sira nia produktu, liu husi meius sira atu ema bele sosa sira nia protudu barak liu (**haktuir husi Diretora ACbit, Sra. Maria Manuela Leong Pereira, iha data 5 Outubru 2020, oras 14:00 OTL**)

7.2 Apoiu ne’ebé mak ACbit fasilita bele hasae ita boot (fetu vítima) sira nia rendimentu kalae?

Tuir **rezultadu intrevista ho vítima MP**, iha 2015 hau hetan apoiu fundus kiik USD 200.00 husi ACbit, osan ne’ebemak hau heta hodi sosa bua ho malus, lis, batat, no koto hodi fan iha merkadu, husi rendimentu ne’ebemak hau hetan, hau tau hamutuk sosa fali fahi hodi hakiak to boot mak hau fan no mós troka fali ho karau. Osan ne’ebemak ACbit apoiu mai hau hodi halo negosiu ne’e, hau tau hamutuk too hetan USD 2000.00, hau uza mak USD 500.00 hodi kontinua halo hau nia negosiu no restu ne’e hau rai hamutuk bainhira presija mak hau uza hanesan hodi sosa aimoruk ba hemu no uza ba nesesidade iha uma laran. Dezafiu ne’ebemi hasoru mak, dalaruma ami nia sasan fan loron tomak mós ema la sosa ida. (**2 Outubru 2020, oras 17:00 OTL**)

Além de ne’e atu reforsa tan hanoin iha leten tuir rezultadu intrevista ho **Diretora ACbit Sr. Maria Manuela Leong Pereira**, husi ACbit nia esperiensa rasik apoiu ne’ebemak ACbit fornese ba sira iha balu hetan susesu no balu mós la susesu, atu dehan deit katak, sira ne’ebesusesu maske ho rendimentu kiik maibe sira nia atividade negosiu kontinua lao nafatin no sira ne’ebela susesu maske ita apoiu sira dalarua nafatin sira atividade laiha kontinuasau, hanesan ita apoiu tia uluk hodi hala’o tia sira atividade negosiu depois paratu tia, entaun apoiu tan dala ida maibe nafatin la lao ho diak. Hosi rendimentu ne’ebemak sira hetan, sira tau hamutuk, hodi

selu oan sira ba eskola, sosa sira nia farda eskola no sira nia roupa, balu selu oan sira iha universidade, balu lori hadia sira nia uma, no mós sira balu hari grupu ne’e rendimentu ne’ebesira hetan tau hamutuk depois halo emprestimu no nia pursentu ne’e mak sira rai fali hodi fahe. (**5 Outubru 2020, oras 14:00 OTL**).

7.3 Dezafiu saida mak ACbit hasoru?

Responde husi **Diretora ACbit Sra. Maria Manuela Leong Pereira**, dezafiu primeiru mak osan laiha ka mehi boot atu ajuda ema maibe kbit mak lato. Hanesan ita dehan asuntu tau matan ba fetu vítima sira ne'e importante maibe dezafiu ida mak hanesan ita organziasaun kiik depende ba doadores depois fetu vítima barak mak moris susar, kbit laek no presija ita nia ajuda maibe fundus mak laiha, tanba ne'e fundus sai hanesan dezafiu ida ba ACbit. Ita servisu ona ba vítima sira tinan barak entaun ita labele husik sira, tanba sira nia tinan boot ona ita tenki hare sira urjenti maibe iha tempu hanesan ita laiha kbit atu kobre vítima hotu ho orsamentu ne'ebekiik. Dezafiu seluk mak ita nia servisu advokasia ne'ebemak ita halo atu governu no instituisaun relevante sira bele tau matan ba vítima sira maibe sira nunka tau atensaun ba asuntu ida ne'e, entaun ida ne'e mós sai dezafiu ida ba ACbit maske ita halo esforsu oi-oin maibe tanba laos iha ita nia kontrolu no ida ne'e iha ema *decision maker* sira nia kontrolu, tanba ne'e ita nia luta depende deit ba sorte. **(5 Outubru 2020, oras 14:00 OTL).**

7.4 Governu iha ona politika

espesifiku ruma hodi apoiu ba fetu vítima sira husi konflitu pasadu ka seidak?

Responde husi **Diretora ACbit Sra. Maria Manuela Leong Pereira**, atu dehan deit katak politika ida ne'ebemak espesifiku no sustentavel ba hodi tau matan ba fetu vítima sira ne'e seidak iha, por ezemplu lei ruma kona-ba reparasaun nasional ne'ebemak

lolos tau matan ba fetu vítima sira kbiit laek liu-liu fó apoiu sira, no haforte sira nia rendimentu ne'e seidak iha. Maibe saida mak akontese ona ne'e mak iha ona diploma ministerial ne'ebemak koalia deit katak ACbit tama iha grupu alvu ne'ebemak hetan asesu mós ba orsamentu ne'ebemak ita atu ajuda ba fetu vítima hanesan apoiu ba ekonomia no mós halo workshop ba kura laran kanek ka trauma healing, maibe ida ne'e mós la sustentavel tanba depois de troka fali ministru ka ministra foun hodi asume fali kargu iha ministeriu kompetente, ministru/a ne'ebemak laiha sensibilidade ba ida ne'e no ladun kompende kona-ba asuntu fetu vítima sira nian entaun apoiu sira ne'e lakon, hanesan ACbit husi 2010 to 2017 hetan apoiu husi Ministeriu Solidariedade Sosiál (MSS) no mós hetan apoiu ituan husi Secretaria Estado e Mulher (SEM) iha tempu VI Governu Constitusional, maibe depois de iha 2018 iha ona mudansa ba governu ACbit la hetan ona apoiu husi ministeriu rua, tanba laiha politika ida ne'ebemak obriga sese deit mak ba asume kargu ministro ka ministra tenki halo tuir ida ne'e, maibe ita bele dehan ida ne'e seidak iha. Além de ne'e politika ida ne'ebediak mak dekretu lei husi primeiru ministru V Governu Constitusional Dr. Rui de Araujo, hodi estabele Centro Nacional Chega

(CNC), maibe ezistensia CNC nian durante tinan 3 ona maibe CNC hala"o nia knar seidak fó atensaun espesifiku hodi ajuda vítima sira ne'ebemak kbiit laek tanba ne"e CNC hanesan instituisaun governu bele hala"o nia papel ida ne"e ho diak hodi apoiu ba fetu vítima sira husi konfliktu pasadu. (5 Outubru 2020, oras 14:00 OTL).

7.5 Oinsa ACbit nia koperasaun ho instituisaun seluk inklui governu no Sociedade Civil hodi tau matan ba fetu vítima sira?

Responde husi **Diretora ACbit Sr. Maria Manuela Leong Pereira**, luta ida ne'ebemak naruk no susar tebes entaun meius importante ida mak tenki haforte ita nia rede servisu, no ita nia servisu ne'ebemak iha tenki ema fuan boot, komitmentu hanesan oinsa atu luta ba ida ne"e, hanesan koloborasaun servisu hamutuk ho governu, ami hanoin ida ne"e importante tebes maibe laos servisu deit ho instituisaun sira hanesan Ministeriu Solidariedade Sosiál no Inclusão (MSSI) maibe tenki servisu mós ho ma individu iha instituisaun refere ne'ebemak hatene duni kona-ba asuntu vítima, entaun ita tenki loby ho ema save sira ne"e importante, tanba ne"e ami nia estratejia barak liu servisu ho ema individu atu atinji objetivu ruma.

Além de ne"e ho sociedade sivil doadores internacional sira sai hanesan kontaktu importante ba ACbit, se doadores ne'ebemak iha vizaun hanesan liu-liu ba sira ne'ebeservisu hare ba direitus umanus, direitu fetu, direitu ekonomia, no direitu labarik fetu sira nian ne"e sai hanesan alvu parseiru ne'ebemak importante tanba sira mós bele ajuda ita, atu habelar ita nia programa, atu atinji ita nia objetivu liu husi fundus ne'ebemak sira apoiu ba ita. Tanba ita laiha kbit atu lao mesak no ita nia governu ladun apoiu entaun doadores internacional sira ne"e sai hanesan alvu importante. Se ita hare ba doadores internacional sira laos depende ba ema individu maibe depende ba sira nia misaun no vizaun, maske ema bele troka maibe sira nia misaun lao nafatin tuir sistema. Ho parseiru sociedade civil iha Timor nian liu-liu atu haboot ita nia lian sai makas, kria lutu ida metin hodi hasoru buat ruma ne'ebemak kontra ita no mós atu haboot ita lian ba governu, haboot lian ba mundu internacional atu hatudu ita nia ezistensia no mós hatudu asuntu sira ne'ebemak lolos tenki presija hetan atensaun. Parseiru sociedade civil ne'ebehare kona-ba asuntu pasadu ne"e ituan deit, ne"ebe lao hamutuk, laran ida no komitmentu ida, entaun ida ne"e nafatin konserva metik katak ita apoiu malu ne"e

importante katak sira ajuda ita maibe ita mós ajuda sira nia servisu, ida ne'e parte ida atu hametin ita nia amizade. **(5 Outubru 2020, oras 14:00 OTL).**

7.6 7.6. Oinsa ACbit nia planu ba oin hodi nafatin tau matan ba fetu vitima sira?

Responde husi **Diretora ACbit Sra. Maria Manuela Leong Pereira** katak, planu ba oin ne'e ita nafatin tau matan ba fetu vitima sira, hanesan ohin hau dehan ona, servisu ho vitima ne'e bainhira iha koñese malu ona ho sira, ita labele husik sira tanba ita halo kontaktu ona ho sira, ita bele dehan to mate mak ita husik sira, se ita halo ligasaun ho sira depois lakon tiha hanesan deit tanba ita mai ke tiha sira nia kanek, ita la kura tivu depois hanesan kanek sai kanek fila fali to mate, tanba ne'e ita servisu ho vitima ne'e laos depende ba individu maibe depende ba organizasaun ne'ebemak misaun no vizaun hanesan, enkuantu fetu vitima sira seidak mate hotu tenki kontinua nafatin servisu ba sira, tanba ne'e ba oin tenki nafatin iha lideransa foun hodi kontinua mehi ida ne'e, se sira mate hotu ona to sira nia oan entaun ita labele tau matan ona. **(5 Outubru 2020, oras 14:00 OTL).**

7.7 Rezultadu intrevista ho fetu vitima sira ne'ebé mak hetan apoiu husi ACbit?

Rezultadu intrevista ho vitima AB, hau hetan apoiu fundus kiik husi Asosiasaun Chega! Ba Ita (ACbit) iha 2015 ho montante USD 200.00, ho fundus ne'ebemak hau hetan, hau uza hodi halo negosiu hanesan sosa bua ho malus, lis mean, lis mutin, koto no tais hodi ba fan iha merkadu, no hau mós uza osan ne'e hodi hola animal hanesan manu no fahi hodi hakiak to boot ba fan fali iha merkadu. Hau mós iha produktu rasik hanesan kafe ho modo, hau nia produktu sira ne'e hau ba fan hotu iha merkadu. Além de ne'e hau mós halo kreditu iha Moris Rasik hodi haforsa halo hau nia negosiu ne'ebemak hau halo. Rendimentu ne'ebé mak hau hetan, hodi selu oan sira nia eskola, no mós sustenta ba moris iha familia. Hau seidak hetanapoiu ruma husi ita nia governu, hau nia lia menon ba governu no estadu tau matan netik mai ami fetu vitima sira husi konflitu pasadu tanba agora ami nia moris susar tebes, ami hein hela bainhira los mak estadu atu tau matan ba ami, pelo menus ami seimoris hela ne'e estadu bele tau matan ba ami hodi hadia netik ami nia moris. Ami mós nafatin husu ba ACbit atu hato ami nia peokupasaun sira ne'e ba governu no estadu hodi bele tau matan netik

ba ami. **(2 Outubru 2020, oras 17:00 OTL).** **Rezultadu intrevista ho vítima MFCS,** iha 2016 hau hetan apoiu jelera ida ho sasan dapur nian husi ACbit, ho apoiu ne'ebé mak hetan bele ajuda ona hau hodi halo hau nia negosiu hanesan fan es, no fan *nasibungkus* iha eskola, no mós dalaruma halo *ketring* wainhira ema hameno. Além de ne'e hau mós halo dosi fan iha uma oin no mós fan obralan iha uma oin. Husi hau nia negosiu ne'ebemak hau halo loron ida hetan USD 8.00 no dalaruma la to'o, maibe se loron ida mak hau USD 8.00, hau uza USD 5.00 hodi kompras sasan no USD 3.00 hau rai iha kofre ka *saving*. Dezafiu ne'ebé hau hasoru mak dalaruma hau nia nasibungkus, es no dosi ne'ebé hau fan mak ema la sosa entaun ami han deit no osan inan ne'ebé hau hodi kompras mós la fila. Maibe hau senti kontenti nafatin hodi halo hau nia negosiu tanba ita servisu iha kantor fulan mak ita foin simu osan maibe ita halo negosiu loron-loron ita hetan osan hela deit maske hetan ituan maibe bebeik. Hanesan feto vítima ida husi konflitu pasadu hau seidak hetan apoiu ruma husi ita nia estadu, ACbit mak foin apoiu netik hau ituan hodi hau bele halo hau nia negosiu maibe laiha buat maske ami hetanviolasaun oin-oin iha tempu konflitu pasadu maibe nia rezultadu mak ita hetan independensia. **(9 Outubru 2020, oras**

15:00 OTL). **Rezultadu entrevista ho vítima EAG,** iha 2016 hau hetan apoiu osan USD 100.00 husi ACbit, osan ne'ebé mak sira apoiu hau hodi sosa trigu halo dosi ba fan iha eskola. Loron ida hau halo dosi to'o USD 5.00 nian dalaruma ema sosa hotu no dalaruma ema sosa la hotu. Trigu bornal ou saku ida hau sosa USD 12.00, trigu saku ida ne'e to'o hau fan hotu bele hetan nia funan USD 10.00. Husi osan ne'ebé mak hau hetan husi fan dosi ne'e hau hodi ba sosa fali modo iha terminal Tasi-Tolu hodi mai fan fali iha uma oin. Rendimentu ne'ebé mak hau hetan husi hau nia atividade negosiu ida ne'e mak hodi sustenta ba hau nia neseseidade iha uma laran. **(8 Outubru 2020, oras 10:00 OTL).**

8. Konkluzau

Bazeia ba rezultadu peskiza no esplikasaun iha obra sientifiku ida ne'e mak hakarak foti konkluzau katak:

1. Papel organizasaun Asosisasaun Chega ba Ita (ACbit) nia papel diak bele halo esforsu makaas tebes hodi ajuda ona feto vitima sira
2. Apoi Governu Timor-Leste mak sei menus

9. Rekomendasaun

Hodi dezenvolve liu tan ekonomia ema hotu nian liu-liu ba fetu vítima kbiit laek sira atu nune'e sira bele hetan rendimentu ne'ebé diak iha familia maka hakerek nain hato'o rekomendasaun hanesan tuir mai ne'e"

1. Governu Timor-Leste liu husi instituisaun relevante sira tenki hala'o sira nia papel ho diak hodi halo reparasaun ba fetu vítima violasaun seksual sira husi konflitu pasadu.
2. Programa sira ne'ebemak ACbit iha presija mós atu hetan atensaun husi governu.
3. ACbit tenki habelar rede servisu ho parseiru sira atu nune'e bele apoiu ekonomia ba fetu vítima violasaun seksual sira husi konflitu pasadu hodi bele hasae sira nia rendimentu iha familia
4. Tenki iha kapasitasaun ba staf sira iha are negosiu kiik atu nune'e bele ajuda fasilita fetu vítima violasaun seksual sira husi konflitu pasadu.
5. Kontinua lobby doador sira hodi hetan fundus atu nune'e ACbit kontinua eziste hodi halo advokasia ba fetu vítima violasaun seksual sira husi konflitu pasadu nia direitu.

Refferensia

1. LIVRU:

- Fatima Sara dos Reis Afonso Maria, 2016, Skripsi "Peranan Organisasi Fokupers Dalam Menangani Kasus Kekerasan Seksual, Terhadap Anak Perempuan", Teoria Papel.
- Roni Legimai Flemon, 2019, skripsi "Kerjasama Alumni Parlametu Foin Sae Timor-Leste (APFTL) Dengan GIZ Dalam Meningkatkan Kapasitas Kaum Muda Di Bidang Pendidikan Moral", Teoria Organizasaun,
- UNPAZ, 2020, Livru Mata-Dalan Hakerek Proposta Peskiza no Monografia Chega! 2005, Relatoriu Final husi Komisaun Lia Lo'os, Simu Malu no Rekonsiliaun iha Timor-Leste (CAVR).
- CEDAW, 2016, Konvensaun Halakon Formas Diskriminasaun Hohu-Hotu Kontra Fetu, Artigu 14: Fetu iha Area Rurais.
- Sugiyono, 2018, Metode Penelitian Kuantitatif, Kualitatif, dan R&D, Bandung Penerbit Alfabeta, Catatan ke-26.
- Iwardono SP, Teori Ekonomia Mikro, Diterbitkan Pertama Kali Oleh Gunadarma.
- Stop Sudah!, 2010, Kesaksian Perempuan Papua Korban Kekerasan Dan Pelanggaran Ham 1963-2009), Jakarta Penerbit PT Sandiwan Media Cipta, Jakarta.
- Kasim, Nurdin, 2015, Sosiologi Konflik Dan Rekonsiliasi, Penerbitan, JI. Sulawesi No. 1, Kampus Bukit Indah, Blang Pulo, Lhokseumawe, Cetakan Pertama.
- CEPAD, 2015, Reziliensia husi Perspektiva Lokal; FAR Timor-Leste Relatoriu Nasional, Publika hosi: CEPAD no Interpeace.
- ADB, 2015, Relatoriu Asia Development Bank (ADB), avaliasaun setór privadu nian iha Timor-Leste, Publika hosi: Asia Development Bank.
- ACbit, 2019, Data Base, Asosiasaun Chega! Ba Ita
- ACbit, 2019, Relatoriu Peskiza Asaun Partisipatoriu (PAP), " Hadia Kondisaun

Moris ba Feto Sobrevivente Sira Iha Timor-Leste” Publika husi ACbit.

2.Internet/website

<http://digilib.unila.ac.id/11463/3/Bab%202.pdf>, Asesu iha loron 10 Maiu 2020

<http://repository.uin-suska.ac.id/4080/3/BAB%20II.pdf>, Asesu iha loron 10 Maiu 2020

<https://www.zonareferensi.com/pengertian-ekonomi/> Asesu iha loron 11 Maiu 2020

<https://projasaweb.com/pengertian-ekonomi/> Asesu iha loron 11 Maiu 2020

<https://www.kajianpustaka.com/2013/01/definisi-usaha-kecil.html> Asesu iha loron 15 Maiu 2020

<http://repository.uin-suska.ac.id/7395/4/BAB%20III.pdf> Asesu iha loron 15 Maiu 2020

<http://yuyantilalata.blogspot.com/2012/10/korban-victim.html> Asesu iha loron 1 Juñu 2020

<https://www.dictio.id/t/apa-yang-dimaksud-dengan-korban/14757/2> Asesu iha loron 8 Juñu 2020

<http://eprints.walisongo.ac.id/7321/3/BAB%20II.pdf> Asesu iha loron 10 Juñu 2020

<https://www.fkpmar.org/falsafah-dan-teori-perang-warisan-carl-von-clausewitz-yang-masih-relevan-sampai-saat-ini/> Asesu iha loron 16 Agostu 2020

<https://kotakpintar.com/pengertian-ekonomi-mikro-menurut-para-ahli/> Asesu iha loron 06 Setembru 2020

<https://www.kompas.com/skola/read/2020/01/22/180000569/ekonomi-mikro-pengertian-ruang-lingkup-dan-teorinya?page=all> Asesu iha loron 06 Setembru 2020